

冲庵顧先生撫遼奏議

冲菴顧先生撫遼奏議卷之十八

通州 益卿顧養謙著

疏

查發侵餉大姦請 旨處分

題為查發侵餉大姦謹請

明旨處分以清積弊以警將來事據分巡遼海東寧
道兼理廣寧等處兵備山東按察司副使鮑希
顏呈問得犯人徐仲魁招年二十七歲係廣寧
左衛中所百戶林松所餘丁萬曆八年五月內
蒙前分巡兵備周副使將仲魁選充書辦與本

衙門在官寫字楊栢厲綸崔世爵談守恩翁宗善各先後撥掌軍餉專管查笑一應錢糧除萬曆十三年以前節蒙巡按衙門奉

勅京盤并十四年已經閱視俱查無侵冒等弊不招外至萬曆十五年正等月內仲魁等與戶部管糧衙門在官寫字王國用張朝重周鸞譚一浩吳朝鸞劉宗福易守信廣寧各營哨掌糧寫字在官前鋒左營左哨牟占兒前鋒裏家丁哨高尚仁朱甫年尚仁翁宗良選鋒左哨朱文太選鋒右哨魏朝廣寧左哨崔祥右哨戴繼文中哨

鮑仲禮前哨孫賓後哨趙彥剛中軍哨汪國江
步哨馮四兒遊兵左哨龍四兒鍾世虎右哨高
尚禮李羔中哨孫尚德李國臣在官委官廣寧
前哨杞總指揮李惟萼遊兵左哨指揮路問津
百戶高應登遊兵右哨指揮王俊百戶湯誥廣
寧右哨旗軍徐九疇前哨旗軍王賓各不合與
先未故前鋒左營左哨委官旗軍林大智前鋒
右營右哨中營中哨委官旗軍田伏掌糧寫字
劉思聰各見年歲饑荒軍丁逃故馬匹倒死甚
多要得乘機通同冒造盜支軍餉分用內仲魁

與楊栢屬綸崔世爵談守恩王國用周鸞譚一
浩張朝重吳朝鸞年占兒各又不合故違沿邊
錢糧有侵盜銀二百兩以上俱照本律仍作真
犯死罪係監守盜者斬翁宗善劉宗福易守信
李國臣高尚仁崔祥戴繼文孫尚德孫賓趙彥
剛鮑仲禮汪國江鍾世虎李羔高尚禮龍四兒
朱甫年尚仁翁宗良李惟萼高應登王俊路問
津各又不合故違遼東沿邊去處有監守盜銀
二十兩以上俱問發邊衛永遠充軍湯誥與廣
寧右衛委官千戶胡國勲各不合故違軍職有

犯監守盜滿貫律該斬罪者發邊方立功五年
滿日還職仍於原衛所帶俸差操各事例自萬
曆十五年春季起至十六年春季止各月各季
官軍家丁俸鈔糧賞馬匹料草多冒米豆草束
布花折銀并換班逃回公差官軍不行開除及
將各官職級冒捏加俸預支重造張世臣等通
共銀一千九百八十八兩五錢六分二釐內除
已還官銀一百五十一兩二錢九分外仍實該
銀一千八百三十七兩二錢七分二釐係仲魁
與楊栢屬綸崔世爵談守恩王國用周鸞譚一

浩張朝重吳朝鸞年占兒翁宗善劉宗福易守信李國臣高尚仁崔祥戴繼文孫尚德孫賓趙彥剛鮑仲禮汪國江鍾世虎李炁高尚禮龍四兒朱甫年尚仁翁宗良朱文太馮四兒魏朝王賓徐九疇李惟萼高應登路問津王俊湯誥各又不合與林大智田伏劉思聰節次冒造盜支侵分各不等仲魁盜分入已銀八十四兩併賊通筭該銀三百九十四兩三錢五分六釐二毫五絲楊栢盜分入已銀八十六兩三錢併賊通筭該銀三百八十八兩七錢七分九釐屬綸盜

分入已銀四十九兩併賊通筭該銀二百三兩
一錢三分崔世爵盜分入已銀六十八兩併賊
通筭該銀二百九十二兩五錢一分談守恩盜
分入已銀七十一兩六錢併賊通筭該銀二百
八十二兩六錢五分五釐王國用盜分入已銀
九十七兩三錢併賊通筭該銀六百二十四兩
六錢九分周鸞盜分入已銀五十九兩五錢併
賊通筭該銀四百五十四兩六錢七分二毫五
絲譚一浩盜分入已銀四十八兩併賊通筭該
銀四百九兩四錢七分五釐二毫五絲張朝重

盜分入已銀五十七兩五錢五分併賊通筭該
銀四百七十九兩八錢五分五釐吳朝鸞盜分
入已銀九十三兩五錢併賊通筭該銀三百八
十五兩六錢八分半占兒盜分入已銀七十三
兩二錢五分併賊通筭該銀二百六十兩二錢
五分翁宗善盜分入已銀三十七兩三錢三分
七釐五毫併賊通筭該銀一百九十四兩二錢
五分一釐二毫五絲劉宗福盜分入已銀一十
八兩四錢五分併賊通筭該銀一百五十七兩
六錢七分八釐七毫五絲易守信盜分入已銀

二十一兩五分併賊通筭該銀一百七十八兩
四錢六分八釐七毫五絲李國臣盜分入已銀
三十八兩一錢九分三釐二毫五絲併賊通筭
該銀七十兩四錢八分八釐二毫五絲高尚仁
盜分入已銀四十七兩七錢九分併賊通筭該
銀一百三十三兩二分五釐崔祥盜分入已銀
四十一兩三錢六分四釐二毫五絲併賊通筭
該銀七十一兩五錢六分四釐二毫五絲戴繼
文盜分入已銀六十二兩一錢三分八釐併賊
通筭該銀一百一十五兩八錢五分八釐孫尚

德盜分入已銀五十六兩九錢六分併賊通筭
該銀一百兩五分五釐孫賓盜分入已銀二十
五兩九錢三釐併賊通筭該銀六十九兩四錢
六分八釐趙彥剛盜分入已銀三十一兩五錢
八釐併賊通筭該銀五十四兩五錢八釐鮑仲
禮盜分入已銀六十二兩六錢二分八釐七毫
五絲併賊通筭該銀一百一十八兩二錢七分
八釐七毫五絲汪國江盜分入已銀四十三兩
八錢七分九釐二毫五絲併賊通筭該銀八十
八兩四錢七分九釐二毫五絲鍾世虎盜分入

已銀四十兩四錢一分九釐七毫五絲併賊通
筭該銀九十七兩三分九釐七毫五絲李羔盜
分入已銀三十八兩八錢二釐五毫併賊通筭
該銀八十五兩七錢四分二釐五毫高尚禮盜
分入已銀五十一兩二錢二分六釐併賊通筭
該銀九十三兩七錢二分六釐龍四兒盜分入
已銀三十八兩三錢七釐五毫併賊通筭該銀
七十九兩六錢一分七釐五毫朱甫盜分入已
銀一十七兩八錢一分五釐併賊通筭該銀陸
十二兩九錢四分五釐年尚仁盜分入已銀一

十一兩五錢六分五釐併賊通筭該銀五十兩
六錢九分五釐翁宗良盜分入已銀一十兩二
錢五分併賊通筭該銀二十八兩六錢八分李
惟萼盜分入已銀一十兩併賊通筭該銀四十
五兩高應登盜分入已銀五兩併賊通筭該銀
二十五兩王俊盜分入已銀五兩併賊通筭該
銀二十五兩路問津盜分入已銀六兩六錢五
分併賊通筭該銀二十八兩三錢湯誥盜分入
已銀二兩五錢併賊通筭該銀五兩七錢七分
五釐馮四兒自盜入已銀一兩一錢一分九釐

王賓盜分入已銀一兩五錢六分五釐併賊通
筭該銀五兩一錢三分魏朝自盜入已銀二兩
四錢三分徐九疇盜分入已銀四兩七錢二分
併賊通筭該銀一十九兩四錢四分朱文太自
盜入已銀一兩二錢已故林大智盜分入已銀
六十四兩田伏盜分入已銀一百四十一兩四
錢九分八釐二毫五絲劉思聰盜分入已銀一
百八兩二釐在官領銀委官選鋒左哨旗軍馮
文倫遊兵中哨百戶丁栢步哨旗軍王國忠各
不合不行舉首外鍾世虎龍四兒各又不合侵

欺在哨管隊金州衛千戶衛惠俸銀三兩二錢
四分入已又將衛惠應支俸銀一兩六錢二分
槩送還庫訖胡國勲又不合重造預支官陳堯
卿等俸銀一兩八錢二分二釐五毫侵欺入已
比有選鋒左哨在官寫字黃世富將新收百戶
陳友功俸鈔誤寫轉除字樣以致混亂俱向未
事發比廣寧左哨委官宋雲鶴張珮陳宗文廣
寧中哨委官楊體元孫守印前哨委官于國朝
陳所聞後哨委官劉守勲劉國輔楊承恩中軍
哨委官丁起鳳遊兵左哨委官張國珍遊兵中

哨千總蔣鈇委官丁栢魏相前鋒左營左哨千
總張國忠前鋒右營右哨千總張永官委官李
世功前鋒中營中哨千總詹鞠養前鋒裏家丁
哨千總金尚禮委官李義張國臣趙維藩盧得
功魯友時鄒添福選鋒左營左哨千總朱文翰
選鋒右營中軍喬官千總熊鑰把總趙葵各不
合失於稽查廣寧衛在官寫字李九叙不合將
已陞義州備禦指揮使李都十五年十一月分
糧銀七錢五分不行開除造入冊內本衛掌印
指揮閻師誨用印之時不合失於稽查後委官

千戶吳邦彥領出前銀不合延至十六年五月
內方纔還庫取獲實收在卷仲魁與楊栢翁宗
善各又不合將盜分銀兩夤夜嫖賭仲魁包姦
在官娼婦張鳳雲一年有餘每月買姦銀三兩
共銀四十兩翁宗善包姦在官娼婦陳鳳兒一
年半有餘每月買姦銀二兩共銀四十兩楊栢
包姦在官娼婦丁定兒一年有餘仍欲姦娶為
妾每月買姦銀五兩共銀六十兩比張鳳雲陳
鳳兒丁定兒各不合陸續接受入已往來包姦
不絕萬曆十六年四月十六日林大智五月初

五日田伏十三日劉思聰各陸續病故隨有廣
寧張通判奉委查造閱視廣寧錦義右屯寧前
十一衛倉庫錢糧文冊仲魁等前項假冒軍餉
彌縫甚密比時通判衙門經管閱視文冊在官
寫字張國忠不合失於細查將閱視過八事文
冊造報巡按衙門類冊

奏繳訖本年七月內蒙分巡兵備鮑副使卷查先
蒙巡撫顧都御史憲牌照得本鎮官吏旗軍家
丁主客俸鈔糧賞料草銀兩除萬曆十三年以
前已經按院奉

勅京盤并十四年聽候閱視清查外該本院會

題家丁選鋒及各哨軍士南衛軍糧共加餉銀七萬四千三百八十兩零通自十五年正月初一日起已經該部運發前來聽管糧衙門分發各道放給去後今照連年饑荒節據各營呈報軍丁逃故馬匹倒死并調操官軍換班回衛公差預支等項恐有不行開除糧料俸賞又節年屢獲捷功新陞官職數多不無乘機冒捏侵盜情弊今當加餉之始合行清查等因備行本道即將所屬支放軍餉銀兩自十五年起加餉以後

備查有無前項冒造侵盜情弊備細查究明白
有罪人員問擬招衆解報以憑施行隨蒙本院
批據本道呈議所屬城堡營哨應該加餉軍丁
分別見在者先准支給迺故者候陸續捉補至
日請明造支仍嚴督將領稽核冒濫緣由蒙批
加餉軍丁開載甚明查照部議以十五年正月
初一日起支但正兵營家丁選鋒近以災厲所
報迺故甚多安得尚有所開見在之數也本院
嘔盡心血費盡唇齒乃能得此於主計者今當
加支之始更有一毫侵冒弊竇則諸將領不惟

有負本院亦且負

主上浩蕩之恩深矣神明當鑒之該道留心嚴核之可也此繳又蒙剿遼總督軍門移咨本院會查逃故有無冒破將領有無朘削邊餉年例近來增多何項糜費當裁何項冗食當革等因案行本道又蒙巡按許御史案驗備行本道查閱錢糧積下若干有無侵冒如有侵欺虛冒那移等項情弊嚴究的確查照律例問擬招叅詳報蒙此俱經通行訖本道遵照節次原行暨蒙撫院前項憲牌批詳將仲魁等經管主客糧料俸賞

各項錢糧文冊開門十數日親自悉心查筭舊管新收開除實在除應支外冒造數多欲就行問又恐不服其心即拘仲魁等到道當堂令仲魁等將冊自行查筭委的通同冒造亦各親筆填註冊內盜支銀數是實本道覆加面審各犯方將前項彌縫實情一一招認隨會戶部管糧周郎中亦查相同仍即會行廣寧張通判會同備禦王紹芳查問招衆解詳各官依蒙審究問在官方汝第原係外家丁左哨舊掌糧字識因不應役聞有前弊嚇要仲魁并楊栢共銀八兩

周鸞銀二兩通共一十兩周鸞等因見各哨冒造軍餉盜支庫銀事發自覺有罪將檢舉情由具狀首赴戶部管糧周郎中處又蒙周郎中查出前鋒右等哨冒造糧銀併行張通判會同備禦王紹芳研究詳奪各官依蒙會審間比周鸞劉宗福易守信王國用譚一浩各又不合將盜分餉銀情由不行實供却妄供各哨投冊不拘差冒每次與銀二兩准免駁冊以致准信備由具呈本部蒙批移冊雖始於道書而交通不行駁扣劉宗福周鸞等受財枉法無疑但恐中有

侵分軍餉者亦當嚴究庶無法外之姦若舉首則為規避甚明此各件與分巡道所查發覺者一事既經會問自應正法仰張通判會同備禦官併呈分巡道轉詳定奪其各未盡弊孔在本部另行完日仍抄招報繳蒙將仲魁等并拘林大智妻魯氏田伏男田三漢劉思聰妻湯氏到官審問李惟萼高應登路問津王俊湯誥各又不合將前分使軍餉銀兩隱下不行供出隨將仲魁等問擬應得罪名具招呈解本道詳審蒙批各犯通同彌縫盜支官餉已無可赦但中間

分賦多寡尚未的實引擬輕重殊覺不倫且李
惟萼等係領銀委官乃冊籍中造有姓名者謂
之不知情不分賦而槩推之字識即三尺之童
可欺乎若然是

朝廷之法止能行於各役而不能行於職官矣非
所以服人心而彰公道也仰二官再加鞠究務
使律例與情節相符三日内解詳行間又蒙戶
部周郎中訪得書辦周鸞等通同道書及各營
哨把總委官作弊冒支不行磨對駁扣已經將
有弊各冊并各犯發行會問外但本部已任一

年自十五年四月為始至今其中尚有未盡今
又覆加親查仍有總多撒少而多造米石或開
除而復重支俸糧或冒開陞級多支或轉收幫
收混造係干錢糧相應併發審究牌行張通判
會同備禦王紹芳究問轉詳撫院施行其尚有
未盡查出者聽另發究各官依蒙將發下俸糧
等冊仍提各該委官并仲魁等逐一查對侵冒
糧銀與本道原發單開數目一一面對審証俱
各明實及審李惟萼等方纔供出侵分軍餉前
情在官內仲魁等盜分入已銀兩併賊通等仲

魁與楊栢厲綸崔世爵談守恩王國用張朝重
吳朝鸞譚一浩周鸞年占兒俱二百兩以上俱
例該真犯斬罪翁宗善劉宗福易守信李國臣
高尚仁崔祥戴繼文孫尚德孫賓趙彥剛鮑仲
禮汪國江鍾世虎李羔高尚禮龍四兒朱甫年
尚仁翁宗良李惟萼路問津王俊高應登俱二
十兩以上俱例該永遠充軍湯誥胡國勲俱滿
貫例該立功五年朱文太馮四兒魏朝徐九疇
王賓俱律該雜犯死罪准徒五年逐一審究前
情是的將仲魁等問擬招解到道覆加嚴審無

異叅看得各犯經手錢糧輒肆侵冒上下通同
彌縫甚密表裏為姦牢不可破非本職躬親磨
對清查不能以得其弊源况此軍餉重務屢蒙
總督撫按衙門憲諭稽核不啻三令五申暨觀
律例重則辟刑次則永戍而各官識恬不知畏
敢於違犯若不重加懲治何以儆人心而戒將
來耶既經初覆審勘明確將仲魁等取問罪犯
外結得銀每兩值鈔八十貫招結是實議得徐
仲魁等所犯徐仲魁楊栢厲綸崔世爵談守恩
王國用周鸞譚一浩張朝重吳朝鸞牟占兒翁

宗善劉宗福易守信李國臣高尚仁崔祥戴繼
文孫尚德孫賓趙彥剛鮑仲禮汪國江鍾世虎
李羔高尚禮龍四兒朱甫年尚仁翁宗良朱文
太馮四兒魏朝王賓徐九疇所犯俱合依監守
自盜庫錢四十貫律各斬內徐仲魁楊栢厲綸
崔世爵談守恩王國用周鸞譚一浩張朝重吳
朝鸞年占兒一十一名併賊二百兩以上照例
真犯斬罪翁宗善等二十四名俱雜犯准徒五
年方汝第依恐嚇取人財者計賊准竊盜論加
一等一百二十貫罪止律杖一百流三千里黃

世富王國忠馮文倫李九叙張國忠張鳳雲丁
定兒陳鳳兒俱依不應得為而為之事理重者
律各杖八十方汝第等俱有

大誥減等方汝第杖一百徒三年黃世富王國忠馮
文倫李九叙張國忠張鳳雲丁定兒陳鳳兒各
杖七十朱文太馮四兒魏朝王賓徐九疇方汝
第黃世富王國忠馮文倫李九叙張國忠張鳳
雲丁定兒陳鳳兒一十四名口各照例納贖決
杖徐仲魁楊栢厲綸崔世爵談守恩王國用周
鸞譚一浩張朝重吳朝鸞年占兒一十一名俱

照例真犯斬罪係重刑牢固枷釘監候奏

請定奪翁宗善劉宗福易守信李國臣高尚仁崔祥
戴繼文孫尚德孫賓趙彥剛鮑仲禮汪國江鍾
世虎李羔高尚禮龍四兒朱甫年尚仁翁宗良
一十九名俱照例免徒拘僉妻解發邊衛永遠
充軍招達兵部知會照出徐仲魁等前項盜分
銀兩并已故林大智等於各犯家屬代追還官
入官俱追發官庫收貯叅照廣寧前哨委官廣
寧衛指揮僉事李惟萼遊兵左哨委官東寧衛
前所試百戶高應登廣寧右衛指揮僉事路問

津遊兵右哨委官廣寧左衛指揮僉事王俊不
念邊餉之重希圖盜侵以肥已罔思

國計匪輕惟知攘奪以虧官

明例既犯永戍奚辭遊兵右哨委官金州衛右所試
百戶湯誥廣寧右衛中所副千戶胡國勲侵欺
有跡雖與盜餉者同科然分数未多當與貫盈
者異論廣寧左哨委官廣寧衛指揮僉事宋雲
鶴本衛前所試百戶陳宗文廣寧左衛指揮同
知張珮廣寧中哨委官廣寧左衛中所正千戶
楊體元廣寧中衛指揮僉事孫守印前哨委官

義州衛右所正千戶于國朝廣寧衛後所實授
百戶陳所聞後哨委官廣寧衛指揮僉事劉守
勲廣寧左衛右所實授百戶劉國輔金州衛中
所正千戶楊承恩中軍哨委官廣寧右衛都指
揮僉事丁起鳳遊兵左哨委官廣寧左衛左所
試百戶張國珍遊兵中哨千總寧遠衛指揮僉
事蔣鈇委官蓋州衛右所實授百戶丁栢廣寧
中衛中所實授百戶魏相前鋒左營左哨先管
千總今革任定遼左衛都指揮使張國忠前鋒
右營右哨千總鐵嶺衛都指揮同知張永官委

官蓋州衛署指揮使李世功前鋒中營中哨千
總鐵嶺衛指揮同知詹鞠養前鋒裏家丁千總
鐵嶺衛都指揮僉事金尚禮委官寧遠衛指揮
僉事李義海州衛左所試百戶張國臣鐵嶺衛
署都指揮僉事趙維藩海州衛署都指揮同知
盧得功海州衛指揮使魯友時蓋州衛中所正
千戶鄒添福選鋒左營先管千總今革任義州
衛都指揮使朱文翰選鋒左營中軍金州衛都
指揮同知喬官千總鐵嶺衛署都指揮使熊鑰
把總三萬衛中所實授百戶趙葵字役暗行虛

冒既不能見於先機錢糧任其侵漁又不能發
於臨事廣寧衛掌印指揮同知閻師誨輕於用
印難辭率畧之愆廣寧衛左所副千戶吳邦彥
銀雖交官莫追濡遲之罪以上各官均屬有罪
法應叅究緣係軍職未敢擅便具招連人詳解
到臣覆審無異除批行該道將犯人徐仲魁等
牢固枷釘并翁宗善等俱監候追贓朱文太等
先行發落李惟萼等省候聽叅外該臣會同總
督劉遼保定等處軍務兼理糧餉都察院右都
御史兼兵部右侍郎張

巡按山東監察御

史徐元查得遼鎮軍餉錢糧先年出入輕重部
司得便宜行事撫道以侵官為嫌一切置之不
問自萬曆元年閱視大臣兵部右侍郎汪道昆
因軍餉無憑稽查又以寧前開原領餉軍士遠
來久候不便議

題將京運民運銀兩部司分發各道就近給軍及
稱薊鎮兵備四道會同部屬稽查錢糧遼東巡
撫即不得上例軍門猶得下例各道自今凡隸
本鎮軍餉部司即具數關白巡撫衙門相與計
議部司亦當分立卷宗以待磨勘等因該戶部

覆奉

欽依備咨前來欽遵至今蓋薊鎮薊密永昌凡四道而管糧部臣亦四處處部道同心錢糧稽查為便遼鎮兩河二千餘里之間凡五道而管糧部臣惟一部臣一人既不能遍歷邊城給散而全鎮軍士亦不能盡赴鎮城支領其不得不分發各道者亦勢也顧錢糧所在姦蠹隨之先年閱視大臣謂軍餉無憑稽查者弊在部司之左右也及分發各道立法之初非不善也而日久弊生部司之掌糧書役通同道書漸以滋蔓亦情

與勢之必然也各道去部司遠故書役之弊少
分巡道與部司同城而居故書役得彼此糾結
而弊獨多各哨之掌糧識字造其端部道之書
役應於內領銀之委官蔽其終表裏為奸牢不
可破頃以十五年加餉之始臣等伏念事貴慎
始法必清源不可使姦人得啓弊端軍士不蒙
實惠以孤

皇上浩蕩之恩於是督行該道或發之牌案或見之
批詞或形之面語不啻三令五申矣然非該道
副使鮑希顏多方廉訪銳情釐正閉門十有餘

日手自磨對必得其情而後發則亦誰能任勞
任怨無所顧忌而發此神姦之端哉故今日之
得發此姦者則當時責成各道之明效也而非
管糧卽中周文卿發問其左右且復刻意搜求
同心振剔則承問之官亦安能盡取罪人面質
得情而置之法也以上二臣均應紀錄者也據
議各犯重辟未戍情真無枉相應奏

請定奪伏乞

勅下都察院再加查議

題覆庶法不少貸而姦蠹知警矣再照軍餉之分

發固由部道稽查而造冊請支實自各營之字
識領銀則各營之委官是虛冒之弊其原實自
各營始也各談將領恐其累已揚言曰錢糧不
敢經手是矣而一營之中某衛某官為千總為
把總為管隊有不知其人者乎一日之內軍丁
逃故幾名馬死幾匹有不知其數者乎錢糧委
之不經手可也而千把總管隊之官軍丁逃故
馬匹倒死之數亦可委之於不經手乎則將馬
用彼將矣况千把總之官於軍馬之數則又知
之最親切而無所委責者也將領千把總既明

知官員之職級軍馬之凋耗而託於遠嫌守法
乃束手傍觀任字識之假捏職銜虛冒糧料而
不之問也此謂之守法乎謂之不守法乎其流
之弊又安知無不才將領通同染指其間而陽
為不知也此將領千把總之當責成者其要一
也遼左先年殷富豐稔米一石價止二錢五分
故軍丁月餉折色定於二錢五分從來價也其
後兵荒凋殘米價日貴折色二錢五分不足以
致米一石而軍士之困日甚故先是撫臣再
請加增增月餉至四錢差足抵米一石而支本色之

月則米一石如故是所增者增折色米價也不
出乎米一石之外也非於本色一石之外更增
米若干也造冊支餉止直書加銀若干可也或
不必云加增而米則書一石銀則書四錢可也
今不曰加銀而曰某次加米若干筭該銀若干
又某次加米若干筭該銀若干既費書寫亦煩
打筭用以塗人耳目而為弊數至於筆畫之訛
寫筭子之錯撥其弊益不可窮詰矣且官目軍
丁往往混造一冊漫難稽查此冊式之當改正
者其要二也今幸鎮臣李成梁痛恨前弊與臣

等同心商確立法釐正軍馬則嚴查報之期糧
餉則定造支之式業已明開條款通行五道是
冊式之改正臣等已得便宜行之矣惟是責成
將領千把總等官非奉有

明旨或載之

令甲立為一定之法不足以肅衆志而懲將來併乞
皇上勅法司酌議今後有犯該監守自盜之條者該
營將領千把總等官一體坐罪其侵冒之多寡
情罪之重輕臨時奏

請定奪庶尺籍易清而弊源可塞矣至於大營之兵

固鎮臣肘腋之兵也將領遵新創之法其日報
軍馬之數必不能欺鎮臣自今以往必鎮臣常
如今日與撫臣同心稽察務使餉不虛冒而士
蒙實惠則純忠體

國之大端也功固不在首功下也伏望

天語一叮嚀之俾撫鎮二臣永奉

明命焉為此具本謹題請

旨

議處患病將官

題為議處患病將官事萬曆十三年十二月二十
七日據新陞領兵遊擊曹簠呈稱本職於本月
二十日接得邸報蒙推領兵遊擊員缺正欲奔
走彊場稍圖報稱但今十月內偶感風寒濕證
手足麻木見今動履艱難卧炕服藥尚未痊可
暫難赴任呈乞俯准假限容令調治稍痊即赴
供職等因到臣該臣隨批訪得本官原無大病
豈可託辭有孤推用之意仰即赴任供事毋得
違限取究此繳復據本官呈稱患病日久一時

調治難痊乞賜請假調攝稍痊赴任等因又批
仰暫調理數日依限赴任此繳又牌行開原道
查勘曹簠病勢有無痊可催令赴任續據整飭
開原兵備右叅政王緘呈行據安樂州知州張
一舉呈查得曹簠預於萬曆十三年十月內得
患風寒濕證手足麻木令醫生王勲日每用藥
調治間至萬曆十四年正月初二日蒙督撫衙
門案驗准兵部咨開曹簠推陞領兵遊擊限正
月十二日到任本官患病在先陞任在後及其
一聞委用恐誤限期遂將頭額急於醫灸奈患

病稍深未即速愈是以連次請假如此原無推
諉情弊合無俯賜再寬假期令其依限赴任緣
由并取具醫生甘結回報到道看得曹簋居嘗
慷慨奮馬革裹尸之心今幸拔擢正捐軀報效
之日偶爾患病力不從心屢查情真原非得已
合無俯照原議寬假調理改限赴任或衝邊不
可時刻缺人姑令在籍養病候其痊可之日遇
缺另行推用等因又據遼陽車營遊擊兼都司
局捕事務裴永勲呈稱本職於萬曆十三年十
一月初八日頸後忽生癰毒迄今三箇月餘頭

臉虛腫濃血不止昏暈数次幾至喪生又兼原
在陣傷刀瘡箭眼一齊舉發卧炕日久遍體皆
瘡晝夜疼痛不能動履不堪任事呈乞另委官
員代管姑准假限回衛調治稍愈尚圖策勵供
職等因隨批仰分守道查報續據分守遼海東
寧道兼理邊備右叅議傅霖呈行據遼東都司
經歷司呈查得遊擊裴永勲於萬曆十三年十
一月初八日頸後忽生癰毒此愈彼發又兼原
在陣傷刀瘡箭眼亦又舉發卧炕日久幾希喪
生緣由回報到道看得遊擊裴永勲委於前項

月日患病即今春防所遺兵馬局捕事務缺官
管理相應委官暫代仍行裴永勲回衛調理候
病痊另行咨用員缺乞行

題補等因又據寧遠叅將劉登泰呈稱於萬曆十
四年二月二十五日領兵隨鎮守李總兵從廣
寧鎮邊堡地方出征至二十九日回還因連日
披堅執銳脫甲受風忽得右膀右膝麻木半身
不隨又蕪痰火時復嘔迷飲食難進見今卧炕
愈加沉重不能動履兵馬事務乞行委官代理
俯准調治等因隨批仰寧前道查報續據整飭

寧前兵備右叅政劉易從呈行據寧遠衛掌印
指揮楊景嵩呈帶領醫生李世弼親詣叅將劉
登泰卧榻處所診驗得本官委的忽得右膀右
膀麻木兼有痰火飲食難進見今卧炕用藥調
治未曾痊可為照寧遠素稱衝邊今係春防之
際又興修邊腹壕塹墩臺舖城等工防修兼舉
將官時不可缺今本官既患前疾是實合無委
官暫代兵馬事務准假調理痊可照舊供職等
因又據分守邊備右叅議傅霖呈稱長勇堡備
禦何應魁於本年三月十一日病故等因各到

臣除行各道將各官兵馬事務委官暫代外臣
會同總督薊遼保定等處軍務兼理糧餉兵部
左侍郎兼都察院右僉都御史王 鎮守總
兵官太保兼太子太保寧遠伯李 議照寧

遠一路邊近地衝防禦最急叅將遊擊之官分
地而守時不可缺遼陽車營遊擊兼管局都司
防援開原鐵嶺瀋陽亦屬要務今新陞領兵遊
擊曹簠素稱勇敢患病在先推陞在後勢難卒
愈遼陽車營遊擊裴永勲亦稱勇將但今患病
日久寧遠叅將劉登泰終歲練兵臣不敢沒其

勤出塞大捷臣不敢沒其功但自塞外還師將入邊境痰迷心竅舉動周章如醉如狂幾至自盡已而問之則曰若有所使莫知其故見今病甚不能任事看得以上三員俱屬驍將材難終棄但各有衝邊之責難以在任養病既經各道勘明似應准各回衛調理候病痊之日酌量薦用所遺各官員缺正當春防之際緊急用人查得正安堡車營管遊擊事叅將李維藩素稱勇敢熟知虜情調度則進止有機撫賞則恩威得體且原係寧遠衛世官習其地利選鋒中營叅

將查大受汎河赴急手批強虜而得全塞外衝鋒身被大創而不顧以上二員俱堪補劉登泰員缺如寧遠叅將用李維藩查得原任副總兵姚大節老成持重諳練夷情近出塞已有功勞當一面始盡材畧原任副總兵秦得倚馳若雄飛射驚猿捷提偏師可備手足隨大將如護腹心以上二員俱堪推補李維藩員缺如用姚大節仍應查近日捷功復其副總兵職銜管正安堡遊擊事又查得遼東鎮坐營中軍張世爵膺力方剛戎行久歷料敵每無遺譖行師綽有先

機原任叅將郭夢徵魁偉不群慷慨有志武弁
共推才畧用人當惜盛年以上二員俱堪推補
曹簠員缺如領兵遊擊用張世爵查得西平堡
備禦金承武才識通曉號令嚴明又司塞上之
烽烟深得師中之要領廣寧備禦王咨臣操持
謹潔幹濟動能素懷忠義之心綽有勇敢之氣
以上二員俱堪推補張世爵員缺如坐營中軍
用金承武查得正兵營標兵千總廣寧前屯衛
百戶楊紹先桓桓將種籍籍英聲慷慨當強虜
之鋒材武出諸軍之右廣寧右哨千總廣寧左

衛指揮僉事馬升高年少力強技優志銳遇虜
真能手刃從征每以身先以上二員俱堪推補
金承武員缺又查得金復守備傳士忠精力有
餘防禦甚密政務每能綜理邊陲雅著威名中
固備禦劉仲文目不識丁射能穿甲戰陣則身
冒矢石而不避修防則躬操畚插而不辭以上
二員俱堪推補裴永勲員缺如車營遊擊用傳
士忠查得瀋陽備禦王善政力固優於禦侮才
尤便於理繁金復素稱劇區得此乃能促辦長
安備禦王夢禹壯貌精強性質剛毅業已試其

材具真可任乎衝邊以上二員俱堪推守備補
傅士忠員缺如金復守備用王善政查得前鋒
中營中哨千總加銜備禦鐵嶺衛指揮使張朝
臣膽氣粗雄騎射精熟慣戰目中無虜先驅部
內多功前鋒親兵把總安樂州都指揮僉事李
尚仁特起行間深知戎事身長擬於七尺勇力
冠乎千人以上二員俱堪推補王善政員缺又
查得前鋒裏家丁左哨千總安樂州都指揮使
毋承宣氣歆吞胡力能搏虎隨營惟知酣戰出
塞每有奇勲前鋒親兵把總鐵嶺衛指揮僉事

金尚禮久在操司習知戰陣探虎穴而每得子
奮猿臂而能落雕以上二員俱堪推陞何應魁
員缺伏乞

勅下兵部再加查議將劉登泰曹簞裴永勲准令原
衛調理候疾痊遇缺起用各官與何應魁員缺
即以李維藩等推補庶就近便於任事衝邊不
致乏人矣為此具本謹題請

旨

遵例給由自陳不職

奏為遵例給由并自陳不職乞

賜罷斥以重

鉅典事竊照臣見年五十三歲直隸揚州府通州人由進士嘉靖四十四年十月內除授戶部山西司主事隆慶三年二月內陞本部廣西司署員外郎事主事本年四月內陞本部雲南司署郎中事主事本年七月內陞福建按察司僉事六年閏二月內陞廣東布政使司左叅議本年十二月內征剿嶺東山寇萬曆元年五月內為

仰仗

天威嶺東積年極惡山寇盡數蕩平飛報異常大捷
併叙有功官員以昭勸典事叙功陞廣東按察
司副使萬曆二年二月內以原任福建按察司
僉事考察不及聽調萬曆五年十一月內調補
雲南按察司僉事萬曆八年十二月內陞浙江
布政使司右叅議萬曆十年十二月內陞山東
按察司副使整飭霸州兵備未任萬曆十一年
正月內調浙江按察司副使本年三月內為倡
亂首惡營兵奉

明旨各正典刑并叙効勞文武官員等事陞俸一級
本年十月內調山西按察司副使整飭薊州兵
備萬曆十三年六月內准吏部咨為缺官事該
本部等衙門會題奉

聖旨顧養謙陞都察院右僉都御史巡撫遼東地方
兼贊理軍務寫勅與他欽此備咨到臣除臣欽
遵於本年八月十二日前到遼東地方到任管
事外萬曆十四年正月內為虜賊大舉入犯官
軍奮勇拒剿獲捷保全城堡乞

賜勘議功罪以昭勸懲事因虜犯蒲瀋汎河等處

攻圍城堡官軍出塞搗賊巢穴斬獲首級前賊
解散該兵部題奉

欽依賞銀三十兩二表裏本年五月十二日為大虜
結聚謀犯主將相機出師仰仗

天威官兵奮勇擒斬獲收奇捷事因鎮邊堡邊外可
可毋林斬獲達賊首級擒獲賊屬男女救回被
虜漢人奪獲達馬駝牛夷器等件准吏部咨該
兵部題奉

欽依陞右副都御史照舊巡撫賞銀三十兩紵絲三
表裏萬曆十五年五月內為虜賊屢次大舉入

犯官軍奮勇拒堵保全城堡併出奇獲功事因東虜糲花等節犯鎮夷堡等處斬獲首級保全城堡該兵部題奉

欽依賞銀三十兩紵絲二表裏本年十一月內准吏部咨為撫臣失職尤甚處分全然未及懇乞

聖明並

賜議處以懲炯鑠以協輿論以安邊計事該戶科給事中彭 題前事奉

聖旨該鎮夷情顧養謙既與屬官異議何不先期叅劾姑念邊方事宜著策勵供職該部知道欽此

萬曆十六年正月內准吏部咨為遼東屬夷叛
逆論罪宜及撫臣懇乞

聖明俯順輿情亟

賜顯斥以彰

國法以重邊陲事該南京山西道監察御史田

奏前事奉

聖旨該鎮夷情見在責成鎮巡官處置原未失事顧
養謙着遵前旨供職該部知道欽此本年五月
內為仰遵

明旨剝服負固逆酋恭報捷音以慰

聖懷併乞

俯錄獲功死事人員優叙危苦勞臣以昭激勸大典
以安孤懸重鎮事因剿服逆酋那林孛羅等并
斬獲首級達馬夷噐等件該兵部題奉

欽依陞俸一級給與應得

誥命賞銀三十兩紵絲三表裏本年閏六月內為虜
賊大舉入犯官軍奮勇拒敵保全城堡襲擊獲
功事因虜犯鎮夷堡牽馬嶺驛等處官軍固守
堡城尾賊襲擊斬獲首級達馬夷噐等件該兵
部題奉

欽依賞銀二十兩紵絲二表裏本年十一月內為虜衆內附邊患稍寧乞及時大修邊政以永圖治安事因巡按御史許守恩閱視

奏報本鎮脩守効勞該兵部題奉

欽依加俸一級還賞銀三十兩紵絲三表裏欽此俱備咨前來欽遵訖及照臣於萬曆十三年六月陞右僉都御史本年八月到任管事不計外自萬曆十四年五月十二日陞右副都御史照舊巡撫扣至萬曆十七年四月十一日止連閏實歷俸三十六箇月三年已滿臣係在京正三品

官員例應赴部給由緣奉

勅巡撫邊疆難離任相應遵例具

奏伏念三載考績稽功事而黜陟幽明者

皇上所以馭群臣之

鉅典也故明則必陟幽則必黜然後功罪明而

鉅典重天下萬世信之臣之今日其於功罪幽明

之間自考甚明實有不容自文以欺我

皇上者蓋從出關以來業已矢心不欺而力小任重

不宜以不肖之身塞賢者路久矣徒以封疆多

故嫌於避難故勉強策駑而不敢有所陳乞乃

今則臣得聞之際之日矣能無曰重之言以報我

皇上者哉臣本生長南方不習邊務遲廻仕路素鮮才名誤蒙

聖恩拔置遼左在事迄今已逾四載中間歷副都御史三品俸者已於是年四月十一日三年滿矣所逡巡不敢遽以

聞者則以將士每有微勞輒蒙

湛恩並及常懷因人之慙而言官屢曾論列更荷

曲賜優容益重微幸之懼且三年之內罪狀甚著

不可枚舉舉其大者若夫士因則加之餉歲饑則發之賑

皇上之恩非不渥矣惟臣不能普

皇上之恩故

恩未盡及於涸鮒枯魚北虜則間有捕斬東夷則近亦賓服

皇上之威非不震矣惟臣不能宣

皇上之威故

威未盡加於長蛇封豕將吏之貪邪群小之姦蠹臣等有

請必應

皇上之法非不嚴矣惟臣不能守

皇上之法故

法未盡行於社鼠城狐有一於此已溺其職而況三者並著乎其他臣所不自知而人皆知之與人所不知而臣自知之者又安可擢髮數也遼左之人豈無口舌在

廷之臣豈無耳目況臣智無足稱而智已盡力無能効而力已窮前罪未罰後效難期臣不以此時求去是益自重其罪也

皇上不以此時去臣是益重臣之罪也有如異日者
以僨事敗臣雖伏斧鑕則何及於封疆矣伏乞
皇上鑒臣愚衷非有矯飾

勅下吏部將臣

速賜罷斥別選賢能以充是任庶

皇上黜陟之典益信重於天下而孤陋有託臣分亦
安矣為此具本奏

聞